

Broj: 01-05- /17  
Datum, 25.07.2017.godine

## Z A P I S N I K

sa 6. sjednice V saziva Općinskog vijeća općine Gornji Vakuf – Uskoplje, održane 06. jula 2017. godine u Velikoj sali općine Gornji Vakuf - Uskoplje, sa početkom u 10<sup>00</sup> sati.

Sjednici su prisustvovali izabrani vijećnici Općinskog vijeća, Općinski načelnik Čaušević Sead, Sekretar općine Prijjić Senad, Pomoćnici načelnika – Milić Nikola, Sofić Osman, Šain Branko, Šišić Suad, ovlaštenu predstavnik SDA Agić Adis, direktor JU Apoteka Ivan Dundović, OSCE Terenski ured Travnik Hadžić Amir, predstavnici medija-RTV Bugojno.

Sekretar općine Prijjić Senad, je izvršio prozivku prisutnih vijećnika, tako da je na sjednici bilo prisutno 20 vijećnika i to: Idrizović Dževad, Ramić Adnan ( došao u 10<sup>10</sup> ), Manjgo Ramiz, Brzika Amra, Petrović Haris, Čaušević Merhila ( došla u 10<sup>05</sup> ), Gafić Maid, Demirović-Spahić Alena, Pidro Muris, Hadžiahmetović Dijamin - SDA, Herceg Josip, Novaković Ana, Batinić Goran, Jurina Danijela, Krajina Marinko, Posavac Ivo, Novaković Marin, Žuljević Ivica ( došao u 10<sup>10</sup> ), Elez Berislav – vijećnici Hrvatske liste HDZ BiH, HDZ 1990, HSP BiH i HSS Stjepan Radić, Karamustafić Naser, Kičin Kadir – SDP, Puljarga Sabahudin-SBB, Dedić Šeharzada - DF

Batinić G.-predsjednik OV-a

- Prije samog izjašnjavanja o dnevnom redu današnje sjednice, pošto imamo tačku koja je predložena da ide po hitnom postupku, želim kazati da u članu 124. Poslovnika o radu Općinskog vijeća Gornji Vakuf-Uskoplje stoji;... *Da u prijedlogu za donošenje Odluke ili Općeg akta po hitnom postupku Vijeće odlučuje kao o prethodnom pitanju u toku rasprave o dnevnom redu.* Dakle nakon što predložim dnevni red i nakon eventualnih prijedloga dopune dnevnog reda izjasnit ćemo se o tome da li prihvatamo prijedlog za donošenje akta po hitnom postupku a nakon toga ćemo glasati o predloženom dnevnom redu.
- Za 6. sjednicu Općinskog vijeća Gornji Vakuf – Uskoplje predlažem sljedeći

DNEVNI RED:

1. Vijećnička pitanja
2. Usvajanje Zapisnika sa 5.sjednice Općinskog vijeća Gornji Vakuf-Uskoplje
3. Izvještaj o radu JU Apoteka Gornji Vakuf-Uskoplje za period od 01.01. do 31.05.2017.godine
4. Prijedlog Odluke o privremenom korištenju javnih površina na području Općine Gornji Vakuf-Uskoplje, hitni postupak
5. Prijedlog Odluke o dodjeli u zakup poslovnih zgrada i prostorija Općine Gornji Vakuf-Uskoplje, skraćeni postupak
6. Prijedlog Odluke o produženju važenja regulacionih planova na području Općine Gornji Vakuf-Uskoplje, skraćeni postupak
7. Prijedlog Odluke o prestanku važenja regulacionih planova na području Općine Gornji Vakuf-Uskoplje, skraćeni postupak
8. Informacija o privredi u Općini Gornji Vakuf-Uskoplje u 2016.godini
9. Prijedlog Odluke o izmjenama i dopunama Odluke o naknadama vijećnicima i članovima stalnih i povremenih radnih tijela Općinskog vijeća Gornji Vakuf-Uskoplje, skraćeni postupak
10. Prijedlog Rješenja o imenovanju Komisije za izlaganje na javni uvid podataka premjera i katastarskog klasiranja zemljišta za katastarske općine k.o. Voljice i k.o. Podgrađe
11. Prijedlog Rješenja o razrješenju člana Komisije za statut i propise Općinskog vijeća Gornji Vakuf-Uskoplje
12. Prijedlog Rješenja o imenovanju člana Komisije za statut i propise Općinskog vijeća Gornji Vakuf-Uskoplje

Diskusije:

Sofić O.-ispred predlagača

- Dao je kratko obrazloženje u vezi prijedloga Odluke o privremenom korištenju javnih površina na području Općine Gornji Vakuf-Uskoplje, hitni postupak

Batinić G.-predsjednik OV-a

- Dajem na glasanje da se prijedlog Odluke o privremenom korištenju javnih površina na području Općine Gornji Vakuf-Uskoplje, hitni postupak unese u dnevni red

*Prijedlog da se u dnevni red unese prijedlog Odluke o privremenom korištenju javnih površina na području Općine Gornji Vakuf-Uskoplje, po hitnom postupku usvojen jednoglasno sa ( 21 «za»)*

*Predloženi Dnevni red usvojen jednoglasno sa ( 21 «za» )*

## **Ad. 1.**

### **Odgovori na Vijećnička pitanja**

Krajina M.-Hrvatska lista

- Na prošloj sjednici OV-a, Hrvatska lista postavila je četiri pitanja. Na dva pitanja smo dobili odgovor, zadovoljni smo odgovorima ali nismo zadovoljni načinom postupanja i reakcijom Općinskih službi. U odgovoru se navodi da služba nije zaprimila nikakav zahtjev za izvođenjem radova i da će tek nakon vijećničkog pitanja poslati građevinskog inspektora da izvrši uviđaj na licu mjesta. Mislim da se to ne smije dešavati, smatram da je građevinski inspektor trebao puno prije izaći na teren, puno prije nego što je postavljeno vijećničko pitanje.

Dedić Šeherzada – DF

- Nisam zadovoljna odgovorima koje sam dobila na postavljena vijećnička pitanja. Pitanja nisu lično nikome upućena a odgovori koje sam dobila bili su šturi i bez argumenata. Molila bih da odgovori ubuduće budu što koncizniji, argumentovani i što precizniji.

Kadir Kičin- SDP

- Kao i kolegica Dedić i ja nisam zadovoljan odgovorima koje dobivam na postavljena vijećnička pitanja
- Odgovore koje dobijemo mi izgledaju kao pravdanje za nečije nepravilnosti odnosno pravdanje za nečiji nerad. Tražimo da se konkretno i precizno odgovara na postavljena pitanja.

Naser Karamustafić – SDP

- Zadovoljan odgovorima

### **Nova vijećnička pitanja:**

Kadir Kičin - SDP BiH

1. Da li je upućen prijedlog Vladi SBK za asfaltiranje magistralnog puta Bistrička Rika, tj. na relaciji Gornji Vakuf-Uskoplje – Novi Travnik ?
2. Zašto se nisu izgradili sportsko-rekreativni tereni ( stadioni ) u MZ-a Grnici i Dražev Docu?
3. U kojem vremenskom periodu su planirani radovi na istim ; te kada će doći do realizacije projekta izgradnje i asfaltiranja trotoara na relaciji Dražev Dolac - Pajić Polje ?

### **Usmeni odgovori na vijećnička pitanja:**

Nije bilo usmenih odgovora na 6. sjednici Općinskog vijeća Gornji Vakuf-Uskoplje

## **Ad. 2.**

### **Usvajanje Zapisnika sa 5.sjednice Općinskog vijeća**

Diskusije:-

*Zapisnik sa 5. sjednice Općinskog vijeća usvojen je jednoglasno sa ( 23 «za» )*

### **Ad. 3.**

#### **Izveštaj o radu JU Apoteka Gornji Vakuf-Uskoplje za period od 01.01. do 31.05.2017.godine**

Dundović I.-ispred izvjestioca

- Dao je kratko objašnjenje Izveštaja o radu JU Apoteka Gornji Vakuf-Uskoplje za period od 01.01. do 31.05.2017.godine

Diskusije:

Pidro M.-ispred komisije za društvene djelatnosti

- Komisija za društvene djelatnosti je na svojoj sjednici održanoj 04.07.2017. godine razmatrala Izveštaj o radu JU Apoteka Gornji Vakuf-Uskoplje za period od 01.01. do 31.05.2017.godine, komisija daje pozitivno mišljenje za Izveštaj o radu JU Apoteka, te predlaže Općinskom vijeću da ga usvoji

Gafić M.- ispred komisije za budžet i finansije

- Komisija za budžet i finansije i ekonomska pitanja je na svojoj sjednici održanoj 04.07.2017. godine, razmatrala je Izveštaj o finansijskom poslovanju JU Apoteka Gornji Vakuf-Uskoplje za period od 01.01. do 31.05.2017.godine, komisija da je pozitivno mišljenje o finansijskom poslovanju JU Apoteka, te predlaže Općinskom vijeću da ga usvoji

Idrizović Dž.-SDA

- Na pretprošnoj sjednici Općinskog vijeća usvojen je Izveštaj o radu JU Apoteka Gornji Vakuf-Uskoplje uz jedan prijedlog da direktor pripremi detaljniji Izveštaj sa svim pokazateljima i analizom poslovanja ove ustanove.
- Smatram da je ovaj Izveštaj o radu JU Apoteka Gornji Vakuf-Uskoplje za period od 01.01. do 31.05.2017.godine u najmanju ruku neozbiljan, uzimajući u obzir stanje u kojem se nalazi ova javna ustanova

Herceg J.-HL

- Stanje u JU Apoteka Gornji Vakuf-Uskoplje se ne može tako brzo promijeniti, sam posao ide nekim svojim tokom
- Pokušaj da ova ustanova radi sa „produženim“ radnim vremenom je dovela do toga da je došla kazna od inspekcijske službe.
- Trenutno stanje u ovoj ustanovi je tako da se posluje pozitivno, rješavaju se sve obaveze prema dobavljačima, to se radi uz dogovor sa njima da bi se dug prema njima zamrzio, jer oni imaju interes da prodaju svoj proizvod.
- Smatram da trebamo biti strpljivi i da trebamo dati mogućnost i priliku direktoru da ovu godinu završi, da bi se onda mogli odrediti politički, da li nam ta Javna ustanova treba ili ne treba.

Novaković M.-HL

- Prije dvije sjednice smo imali Izveštaj o finansijskom poslovanju iz kojeg smo vidjeli da je se pozitivno poslovalo za nekih 3.000,00 KM. Direktor je odmah rekao da postoji ta kazna od 11.000,00 KM za koju je rekao da će platiti 50%. Bez te kazne vidimo da je finansijsko poslovanje ove Javne ustanove za ovih pet mjeseci pozitivno za nekih 2.000,00 KM (bez rabata od nekih 6.000,00 KM). Trebamo uzeti u obzir da je neka roba naručena u petom mjesecu a da nije prodana( nekih 2.000,00 KM), što znači da je ovo poslovanje za pet mjeseci jako dobro ako se gleda poslovanje za prošlu godinu ( u plusu nekih 3.000,00 KM)
- Mislim da će ova ustanova na kraju godine biti dobro u plusu, što znači da je lakše vraćati ove dugove prema dobavljačima koji su nastali u nekom prethodnom periodu
- Stanje u ovoj Javnoj ustanovi u ovoj godini je puno bolje u odnosu na stanje koje smo imali u prošloj godini

Čaušević S.-Općinski načelnik

- Predložio bih da direktor i njegov Upravni odbor sjednu i da naprave jedan prijedlog mjera. Nije problem da se Predsjednik Općinskog vijeća i Ja uključimo i da napravimo Plan saniranja ovih dugovanja, da znamo na čemu smo i da vidimo možemo li ispoštovati taj plan u dogovoru sa dobavljačima.

Karamustafić N.-replika

- Smatram da je se mislilo nešto poduzet, poduzelo bi se prije sedam godina. Nismo učinili ništa kada je trebalo, trebalo je zaustaviti stanje kada je Apoteka počela negativno poslovati.
- Moje pitanje glasi: Ko je kriv za ovakvo stanje u JU Apoteka ? Da li je to Nadzorni odbor, direktori ili neko treći? Treba pustiti ljude da rade svoj posao sada kada prvi put posluju pozitivno.
- Treba prihvatiti ovaj Izvještaj i treba pitati ljude gdje su sredstva?

Čaušević S.-replika

- Lijepo je sada reći da vidimo šta je bilo, a bilo je mnogo štošta gospodine Karamustafiću.
- Ova Apoteka je pozitivno poslovala do 2010. godine, odnosno do 2011. godine. Glavni razlog što je počela negativno poslovati je nelojalna konkurencija od strane privatnih apoteka i kada su se privatnim apotekama prebacili lijekovi sa Esencijalne liste.(blizina objekata privatnih apoteka Domu zdravlja za razliku od objekta gradske Apoteke koji je bio daleko od Doma zdravlja)
- Broj zaposlenih u JU Apoteka u tom periodu je bio pet zaposlenih, a da se zadržao taj broj sigurno bi i dugovanja bila veća, možda bi je do danas i zatvorili.
- Slažem se da je trebalo provjeriti način nabavke lijekova, kao i ostale stvari koje se potenciraju da su se radile u okviru poslovanja Apoteke.
- U 2011 godini kada je otišao direktor JU Apoteka, objavljivali smo konkurse za direktora JU Apoteka (uslov je bio da bude magistar Farmacije) ali se niko nije javljao na te konkurse.

Karamustafić N.-replika

- Znete dobro da su Apoteke bile u sastavu Doma zdravlja. Kada je posao počeo da cvjeta odvojile su se od domova zdravlja.
- Prije sedam godina sam predlagao da pomognemo da se sredi stanje u JU Apoteka.
- Odgovornost snosimo svi mi a prvenstveno Vi koji niste htjeli tada da popravite stanje u JU Apoteka

Manjgo R.-SDA

- Nisam bio vijećnik u Općinskom vijeću prije sedam godina i ne snosim nikakvu odgovornost u vezi Apoteke u tom periodu
- Ja sam zato da se sredi stanje u JU Apoteka i ako treba dat im nešto sredstava da otplate određene dugove koje se trebaju platiti

Karamustafić N.-replika

- Kada sam govorio „Mi“ mislio sam na nas vijećnike Općinskog vijeća. Kada kažem „Vi“ mislim na vijećnike SDA i na vijećnike HDZ-a.
- Naša se odgovornost ogleda u tome kada i na koji način glasamo o pojedinoj tački dnevnog reda sjednica vijeća

Dedić Š.-DF

- Podržavam diskusiju kolege N. Karamustafića u vezi svega što je rekao oko JU Apoteka, mislim da je u pravu

Herceg J.-HL

- Mi ovdje trebamo pričati o nekim mogućnostima šta možemo napraviti za JU Apoteka da se stanje popravi
- Ne trebamo se vraćati nazad nekih 5-6 godina nego trebamo vidjeti kako neke stvari promijeniti da stanje bude još bolje, trebamo dati konkretne prijedloge kako to napraviti

Dundović I.-odgovori

- Prihvaćam prijedlog Općinskog načelnika da se napravi zajednički sastanak sa firmom MGM i da vidimo šta napraviti da se stanje popravi
- Slažem se da je potrebno napraviti određeni Plan u vezi sanacije postojećih dugova

Batinić G.-predsjednik OV-a

- Dajem na usvajanje Izvještaj o radu JU Apoteka Gornji Vakuf-Uskoplje za period od 01.01. do 31.05.2017.godine: *Prihvata se Izvještaj o radu JU Apoteka Gornji Vakuf-Uskoplje za period od 01.01. do 31.05.2017.godine*

*Zaključak o Izvještaju o radu JU Apoteka Gornji Vakuf-Uskoplje za period od 01.01. do 31.05.2017.godine usvojen jednoglasno sa ( 23 «za» )*

#### **Ad. 4.**

### **Prijedlog Odluke o privremenom korištenju javnih površina na području Općine Gornji Vakuf-Uskoplje, hitni postupak**

Sofić O.-ispred predlagrača

- Dao je kratko obrazloženje Prijedloga Odluke o privremenom korištenju javnih površina na području Općine Gornji Vakuf-Uskoplje, hitni postupak

Diskusije:

Petrović H.-ispred komisije za prostorno planiranje, uređenje i ekologiju

- Komisija za Prostorno planiranje, uređenje i ekologiju je na svojoj drugoj sjednici održanoj 05.07. 2017. godine razmatrala prijedlog Odluke o privremenom korištenju javnih površina na području Općine Gornji Vakuf-Uskoplje, komisija daje pozitivno mišljenje na prijedlog Odluke o privremenom korištenju javnih površina na području Općine Gornji Vakuf-Uskoplje, te predlaže Općinskom vijeću da ga usvoji.

Herceg J.-ispred komisije za Statut i propise

- Komisija za Statut i propise je na svojoj sjednici održanoj 05.07.2017. godine, razmatrala je prijedlog Odluke o privremenom korištenju javnih površina na području Općine Gornji Vakuf-Uskoplje i na istu ima određene prijedloge i primjedbe.
- U preambuli gdje stoji navod Službenih novina stoji;.... *"Službene novine Federacije BiH", broj 49/06...., treba dodati,.... i 51/09 člana 29. Stav 1. Zakona o privremenom korištenju javnih površina.....*
- U članu 1. *stoji;....( u daljnjem tekstu: Općine), međutim u tekstu se ponovo spominje općina Gornji Vakuf-Uskoplje, to treba ispraviti*
- Član 4. *treba uskladiti sa članom 3. Zakona o privremenom korištenju javnih površina SBK*
- Komisija je mislila da ovu Odluku pripremaju dvije službe ( Sofić O. Je rekao da to radi jedna služba) i da je trebalo naglasiti koji dio Odluke radi jedna a koji dio druga služba. Neznam da li po zakonu se to može, po ovom Zakonu bi to trebalo da radi i druga služba
- U članu 10. gdje stoji;...*ime i prezime lica, naziv radnje....; treba dodati;.... i firme....*
- U članu 10. druga alineja gdje stoji;... *kopiju odobrenja za građenje (za slučajeve iz člana 4. stav 1. tačka 13. 14. 15 i 17 ove Odluke...; a treba.... kopiju odobrenja za građenje (za slučajeve iz člana 3. stav 1. tačka 13. 14. 15 i 17 ove Odluke*
- U članu 13. stoji;...*Nadležna služba...; a treba ;...Služba za lokalni razvoj i stambeno komunalne poslove*
- U članu 19. stoji;... Pravo privremenog korištenja javne površine *može prestati* i prije isteka roka...; a treba... Pravo privremenog korištenja javne površine *prestaje* i prije isteka roka....
- Komisija smatra da je član 20. višak , po nama on nije potreban
- U članu 21. stoji; ..... *Prikupljena sredstva naknade koriste se za prihod budžeta...; a treba .... Prikupljena sredstva naknade su prihodi budžeta općine i koriste se shodno zakonu*
- Član 36. tačka 3.stoji;... ako izda komunalno odobrenje i odobri privremeno korištenje javne površine suprotno članu 12., 13. Odluke, a treba ;.... ako izda komunalno odobrenje i odobri privremeno korištenje javne površine suprotno članu 12. i 13 Odluke.
- U članu 37. stoji;... Ako je do stupanja na snagu ove Odluke podnesen zahtjev za privremeno korištenje javne površine za  *narednu kalendarsku godinu*, a treba;... Ako je do

stupanja na snagu ove Odluke podnesen zahtjev za privremeno korištenje javne površine za *tekuću godinu*

- U članu 38. stoji, *...dosadašnja Odluka...*; treba navesti *naziv i broj Odluke i broj Službenih novina*

Puljarga S.-ispred komisije za prostorno planiranje, uređenje i ekologiju

- U članu 3. Javne površine mogu se privremeno koristiti za postavljanje : pod stavkom 16. stoji;... ostalih specifičnih sadržaja kao i u svrhu osiguranja normalnog prilaza i ulaza u javne, poslovne i druge objekte (npr. postavljanje rampe za invalidna lica, pomoćnih i glavnih stepeništa, itd.). Predlažemo da se doda „*stambene*“ i da onda glasi; *... ostalih specifičnih sadržaja kao i u svrhu osiguranja normalnog prilaza i ulaza u javne, stambene, poslovne i druge objekte (npr. postavljanje rampe za invalidna lica, pomoćnih i glavnih stepeništa, itd.)*.
- U članu 4. stav 2. na kraju stoji; *... Na javnim površinama između stambenih, stambeno-poslovnih zgrada, garažnih i drugih prostora u cilju nesmetanog prilaza zgradama, poslovnim prostorima i garažama, zbog parkiranja vozila i ostalih nedopuštenih radnji, može se odobriti postavljanje stubića, betonskih vaza, žardinijera i ostalih pokretnih barijera*. Da li se ovdje može ubaciti „*markiranje ulaza*“ ispred zgrada.

Idrizović Dž.-SDA

- U članu 27. stoji; *... Mjesečna naknada za privremeno zauzimanje javne površine u svrhu korištenja prilazne saobraćajnice, poligona za obuku vozača, parkinga ispred poslovnog prostora, postavljanja građevinske skele uz objekt koji graniči sa javnom površinom, za postavljanje stepeništa i rampe za invalidna lica...*Javne ustanove su dužne da imaju prilaz za invalidna lica, da li se to odnosi i na privatnike. Jesmo li po zakonu dužni to napraviti ili moramo plaćati ovu rampu ako se instalira, interesuje me šta o tome zakon kaže.
- Mene kod ove Odluke najviše interesuje nadzor nad provođenjem iste.
- Definicija javne površine, govorio sam o problemu u vezi izgradnje bespravnog objekta na potoku „Barica“, koji kaže: „Ovo je javna površina, ja ovdje mogu šta hoću“. Ispada da on to i može jer od dvanaestog mjeseca kada je došlo Rješenje od inspekcije za uklanjanje tog objekta, on i dalje stoji.

Karamustafić N.-SDP

- Član 14.stoji; *... ako korištenje javne površine ne ometa sigurnost odvijanja saobraćaja i pješačkog prometa, tj. na jednoj strani ulice tog dijela saobraćajnice mora biti slobodan trotoar minimalne širine 1,50 m*. Postavljam pitanje; Šta će se desiti ako na trotoaru ispred „Lambade“ čovjek sjedi a uleti kamion. Ko će biti odgovoran, ko će snositi krivičnu odgovornost? Mi koji sjedimo ovdje što smo donijeli takvu Odluku, vlasnik kafića ili šofer koji može imati nekakvih zdravstvenih problema pa uleti na terasu ( trotoar) koji ne bi smio nikako biti terasa.

Sofić O.-odgovori

- Ovo je samo prijedlog Odluke. Mi smatramo da je ova Odluka dobra i da kao takva treba da ide na sjednicu vijeća
- Sve vaše prijedloge i primjedbe koje su dobre mi ćemo razmotriti i spremni smo na određene kompromise
- Prihvaćamo prijedlog komisije za Statut i propise u vezi preambule ove Odluke
- Mi smatramo kad je u pitanju nadležnost da treba biti jedna služba, Vi ste ti koji će na kraju odlučiti.
- U članu 10 spominju se pravne osobe ( Uz zahtjev je potrebno priložiti: kopiju rješenja nadležnog organa za obavljanje djelatnosti za koju se traži korištenje javne površine, odnosno *kopiju akta o registraciji za pravne osobe* )
- Sve primjedbe koje je iznio Herceg J. ispred komisije za statut i propise stoje i mi ćemo to ispraviti
- Prihvaćamo primjedbu vijećnika S. Puljarge na član 3., stavit ćemo... i *stambene* objekte...
- Sve Javne ustanove moraju imati prilaz za invalidna lica. Svi objekti bi trebali da imaju prilaze za invalidna lica, činjenica je da većina objekata nema. Objekti se naprave bez tih prilaza a kada se naknadno rade onda se naprave na javnoj površini i onda je mi privremeno naplaćujemo.

- Mi smo stava da se na trotoarima ne mogu postavljati nikakvi objekti, trotoari se ne mogu koristiti kao terase. Sigurnost pješaka je na prvom mjestu. Kada se bude radila rekonstrukcija „Gradske ulice“ nećemo dozvoliti postavljanje bašta na trotoarima. Sada je situacija drugačija i mi ćemo to tolerisati do završetka rekonstrukcije navedene ulice.

Elez B.-HL

- Veliki broj prethodnih diskusija kad je u pitanju ova Odluka je trebalo da bude na prethodnoj sjednici kada je na dnevnom redu bio Plan korištenja javnih površina
- Na prošloj sjednici vijeća smo usvojili prijedlog Plana korištenja javnih površina na području Općine Gornji Vakuf-Uskoplje gdje smo sve ovo omogućili, u ovoj odluci to je samo finalizirano na koji način i pod kojim uslovima će to biti davano pojedinim korisnicima
- Tada sam rekao da je ovaj Plan pun manjkavosti, nisu razgraničene i nisu označene sve javne površine, nije definisano šta je to javna površina.
- Ova Odluka ulazi i u druge Odluke kao što je Odluka o naplati parkirnih mjesta ( činjenica je da mi nemamo odluku o naplati parking mjesta)
- Glasat ću za ovu Odluku iz razloga što smatram da je ona privremenog karaktera i zbog toga što smatram da je bolja bilo kakva odluka nego nikakva

Herceg J.-HL

- Kantonalni zakon o korištenju javnih površina u članu 22. kaže: *Upravni nadzor nad provedbom odredbi ovog Zakona obavlja Ministarstvo, Općinska služba za urbanizam i Općinska služba za komunalne poslove, svako u okviru svoje nadležnosti.*
- Zakon nam kaže i gura nas u tom pravcu da bi obe službe trebale taj dio završavati

Karamustafić N.-SDP

- Pitam, kome ćete dodijeliti prostor ako se dva kafića nalaze jedan preko puta drugog a koriste oba trotoare ?

Novaković M.-HL

- Ne bi bilo loše da se za parking mjesta donese posebna Odluka.
- Postoji li ili ne postoji mogućnost da neko zakupi parking mjesto ispred kafića ? Postoji li ikakva Odluka da se može zakupiti takav prostor za parking mjesta ?
- Ovo pitanje koje je N. Karamustafić postavio, mi smo na prošloj sjednici Općinskog vijeća usvojili Plan privremenog korištenja javnih površina gdje je to definisano (može se koristiti trotoar za postavljanje terase ako ostaje slobodan dio od 1,5 m za pješake, trotoari će se moći koristiti za terase do rekonstrukcije „Gradske“ ulice)

Dedić Š.-DF

- Interesuje me kako ja sigurno da dođem do svoje kuće u ulici koja nema trotoara, u ulici u kojoj se svakodnevno nešto „odlaže“, stalno se parkiraju vozila i dr. Takva nam je situacija u većini ulica u gradu.
- Moj prijedlog je da se ova Odluka odgodi za sljedeću sjednicu vijeća

Elez B.-replika

- Poslije svih ovih diskusija potvrđuje se sve ono što sam maloprije rekao. Na prošloj sjednici smo donijeli plan korištenja javnih površina u kojem je opisano kako se neka javna površina može iznajmiti.
- Manjkavost ovog plana je što nije definirano kako će se iznajmljivati javne površine u malim ulicama.

Karamustafić N.-SDP

- U Gradskoj ulici je zauzeta kompletno desna strana svakodnevno i pješaci se ne mogu kretati tim prostorom
- Nisam čab govorio kada sam predlagao da se u ljetnom periodu zabrani saobraćaj u Gradskoj ulici od 07-23 sata da bi pješaci mogli nesmetano prolaziti

Čaušević S.-Općinski načelnik

- Mislim da su zadnje diskusije otišle u pogrešnom pravcu van ove odluke, ne trebaju se neke stvari prejudicirati prije nego se nešto ne uradi
- Usvajanjem ove Odluke želimo natjerati građevinskog i komunalnog inspektora da rade svoj posao

- Ova odluka sigurno nije najbolja, svi možemo dati neke svoje prijedloge da bi se ona nadopunila

Idrizović Dž.-SDA

- Na prošloj sjednici vijeća iznio sam određene primjedbe u vezi Plana korištenja javnih površina
- Smatram da je đaba nama odluka ako nadležni inspektor ne radi svoj posao, glavni problem je u tome što neko ne radi svoj posao a prima platu
- U primjeni nekih odluka nažalost imamo slučaj „duplog aršina“ što ne bi nikako smjelo biti ali nažalost tako je stanje
- Ja i moje komšije imamo problem radi nerada Općinske službe, odnosno konkretno građevinskog inspektora koji ne radi svoj posao

Sofić O.-ispred predlagača

- Za dosta toga ste Vi postavili pitanje i na ista ste manje-više odgovorili
- Činjenica je da je stanje dosta nesređeno ali odgovorno tvrdim da nema duplih aršina, prema svim strankama se odnosimo jednako. Gdje postoji mogućnost da nekom pomognemo mi pomognemo, gdje nema mogućnosti mi ne pomažemo.
- Kada uradimo rekonstrukciju Gradske ulice sigurno je to da ćemo biti pred velikim ispitom. Tada ćemo morati povući liniju i reći da li želimo ovaj grad učiniti gradom ili ne želimo.
- Činjenica je da i građevinski i komunalni inspektor moraju raditi puno bolje nego što sada rade
- Inspeksijska služba nije u mojoj nadležnosti odnosno mojoj službi
- Kada se uradi rekonstrukcija Gradske ulice neće se moći postavljati terase ni sa jedne ni sa druge strane ulice iz razloga što će biti trotoari, izuzev ako od objekta do trotoara postoji slobodan prostor koji bi mi mogli dodijeliti za korištenje
- Kada se završi rekonstrukcija Gradske ulice tačno će se znati gdje će biti parking mjesta a gdje se neće moći parkirati
- Činjenica je da mi nemamo usvojenu Odluku o parkiranju, ali isto tako neke firme, neki ugostiteljski objekti traže da imaju određeni prostor ispred objekata da bi im klijenti ili gosti mogli parkirati prilikom posjete njihovoj firmi ili objektu. Rješenje je to da niko ne ispašta, odnosno da se iziđe u susret ako se može.
- Ova odluka je sigurno jasna i dobra, dosta toga je obuhvatila što je bilo potrebno da obuhvati, odnosno što je Zakon propisao.
- Dostava robe u Konzum se vrši u svaka doba dok je u drugim gradovima to regulisano na način da se tačno zna od kada do kada se to može raditi

Batinić G.-predsjednik OV-a

- Predlažem pauzu od deset minuta i pozivam predsjednike klubova na konsultacije

( Pauza od 11<sup>40</sup> 12<sup>00</sup> )

Batinić G.-predsjednik OV-a

- Pozivam O. Sofića da nam predstavi konačni tekst Odluke koji smo usaglasili

Sofić O.-ispred predlagača

- Usaglasili smo se da prihvatamo sve primjedbe i sugestije komisije za statut i propise
- U skladu sa zakonskim odredbama da razdvojimo nadležnost službe za prostorno planiranje, imovinsko pravne poslove i katastar i Službe za lokalni razvoj i stambeno komunalne poslove koja bi izdavala komunalna odobrenja
- Dogovorili smo se da se u članu 20. stav dva izbriše jer je suvišno
- Iza člana 36. dodaje se član 37. koji preuzima kaznene odredbe iz člana 27. Zakona o privremenom korištenju javnih površina

Batinić G.-predsjednik OV-a

- Dajem na usvajanje Prijedlog Odluke o privremenom korištenju javnih površina na području općine Gornji Vakuf-Uskooplje, hitni postupak uz navedene izmjene i dopune komisije za Statut i propise



*Prijedlog Odluke o privremenom korištenju javnih površina na području Općine Gornji Vakuf-Uskoplje, hitni postupak uz navedene izmjene i dopune usvojen sa većinom glasova ( 20 «za», 3 „protiv”, 0 „suzdržanih” )*

## **Ad. 5.**

### **Prijedlog Odluke o dodjeli u zakup poslovnih zgrada i prostorija Općine Gornji Vakuf-Uskoplje, skraćeni postupak**

Sofić O.-ispred predlagača

- Dao je kratko obrazloženje Prijedloga Odluke o dodjeli u zakup poslovnih zgrada i prostorija Općine Gornji Vakuf-Uskoplje, skraćeni postupak
- Moram naglasiti da u članu 24.; ulaganje u poslovne prostorije; *Zakupac nema pravo na naknadu sredstava, povrat sredstava, niti na kompenzaciju sa zakupninom iznosa nepovratnih ulaganja u poslovne prostorije, izuzev u slučaju iz člana 31. Odluke, ovo ;... izuzev u slučaju iz člana 31. Odluke ...treba brisati.*

Diskusije:

Herceg J.-ispred komisije za Statut i propise

- Komisija za Statut i propise ima određene primjedbe u vezi Prijedloga Odluke o dodjeli u zakup poslovnih zgrada i prostorija Općine Gornji Vakuf-Uskoplje, skraćeni postupak;
- U preambuli stoji;... *U skladu sa odredbama Zakona o zakupu poslovnih zgrada i prostorija ("Službeni list SRBiH" br. 33/7...; a trebalo bi;... U skladu sa odredbama Zakona o zakupu poslovnih zgrada i prostorija ("Službeni list SRBiH" br. 33/77....Umjesto 12/87 treba stajati 2/87*
- U članu 1. stoji... ( u daljem tekstu: Općina), u tekstu i dalje stoji Gornji Vakuf\_Uskoplje, to treba ispraviti
- U članu 5 stoji;... *Odluku o dodjeli u zakup poslovnih prostorija donosi Općinski načelnik..., na drugom mjestu stoji Općinsko vijeće, te stvari treba malo doraditi, malo su nejasne.*
- U članu 6 stoji;... *Postupak dodjele u zakup poslovnih prostorija provodi Komisija koju imenuje Općinsko vijeće, ove stvari su malo nejasne, treba ih malo doraditi.*
- U članu 6. pod f). stoji;... *daje prijedlog vansudske nagodbe Općinskom vijeću za rješavanje sudskog spora sa zakupcem uz obavezno mišljenje pravobranilaštva općine Gornji vakuf-Uskoplje...; a treba;... daje prijedlog vansudske nagodbe Općinskom vijeću za rješavanje sudskog spora sa zakupcem uz obavezno mišljenje Općinskog Pravobranilaštva Bugojno*
- Član 8. tačka 2. stoji;... *Sadržaj javnog oglasa priprema Općinski načelnik na prijedlog Komisije u skladu sa zakonom i ovom odlukom, sa naznakom namjene poslovne prostorije, kao i mjesta i vremena javnog objavljivanja vrednovanih ponuda, a treba ;... Sadržaj javnog oglasa priprema Komisija u skladu sa zakonom i ovom odlukom, sa naznakom namjene poslovne prostorije, kao i mjesta i vremena javnog objavljivanja vrednovanih ponuda.*
- Isti član, tačka 3.;...*namjena poslovnih prostorija u smislu prethodnog stava utvrđuje se u skladu sa općinskom odlukom kojom je utvrđen raspored poslovnih djelatnosti na području Općine, mislim da nemamo donesenu ovakvu odluku i da se ovo treba brisati.*
- Član 16. tačka 3. stoji;... *Prije zaključenja ugovora o zakupu poslovnih prostorija, općina Gornji Vakuf – Uskoplje u svrhu obezbjeđenja može tražiti će od korisnika poslovnih prostorija da dostave..., treba brisati riječ ....može....*
- Član 22. tačka 2. stoji;... *Utvrđeni iznos zakupnine iz prethodnog stava obuhvata i naknadu za pružanje električne energije i drugih usluga koje padaju na teret općine Gornji Vakuf – Uskoplje...,komisija smatra da to treba brisati*
- Član 24. stoji;... *Zakupac nema pravo na naknadu sredstava, povrat sredstava, niti na kompenzaciju sa zakupninom iznosa nepovratnih ulaganja u poslovne prostorije, izuzev u slučaju iz člana 31. Odluke..., treba brisati;... izuzev u slučaju iz člana 31. Odluke...*

Idrizović Dž.-SDA

- Smatram da u članu 16. treba odrediti tačan broj mjenica, možda da se traže minimalno tri mjenice
- U članu 28. stoji;... na osnovu Zakona., smatram da treba stajati na osnovu kojeg zakona

Sofić O.-ispred predlagača

- U preambuli gdje je naveden broj Službenih novina stoji;...("Službeni list SRBiH" br. 33/7..., a treba ("Službeni list SRBiH" br. 33/77...
- Prihvatamo primjedbe komisije za statut i propise i to ćemo ispraviti
- U članu 28. na kraju trebalo bi da stoji;... *i podzakonskim aktima donešenih na osnovu zakona.*
- Moj stav je da je nadležnost općinskog načelnika i da tako treba stajati u ovoj odluci

Batinić G.-predsjednik OV-a

- Predlažem pauzu od pet minuta i pozivam predsjednike klubova na konsultacije

( Pauza od 12<sup>22</sup> 12<sup>37</sup> )

Batinić G.-predsjednik OV-a

- Pozivam O. Sofća da nam prezentuje usaglašeni konačni prijedlog Odluke o dodjeli u zakup poslovnih zgrada i prostorija Općine Gornji Vakuf-Uskoplje, skraćeni postupak

Sofić O.-ispred predlagača

- Dogovorili smo se, odnosno usaglasili da u članu 6. stav 4. tačka c),...utvrđuje prijedlog Odluke o dodjeli pod zakup poslovnih prostorija i dostavlja Općinskom načelniku
- U članu 8. tačka 3. se briše
- Iza člana 29. dodaje se novi član koji će predvidjeti žalbeni postupak u slučaju žalbe na Odluku Općinskog načelnika a isti će provoditi stručna upravna komisija u skladu sa ovom odlukom

Batinić G.-predsjednik OV-a

- Dajem na usvajanje Prijedlog Odluke o dodjeli u zakup poslovnih zgrada i prostorija Općine Gornji Vakuf-Uskoplje, skraćeni postupak, sa prijedlozima i dopunama komisije za Statut i propise i ostalim prijedlozima koje je predlagač prihvatio

*Prijedlog Odluke o dodjeli u zakup poslovnih zgrada i prostorija Općine Gornji Vakuf-Uskoplje, skraćeni postupak uz gore navedene dopune usvojen sa većinom glasova ( 20 «za», 0 „protiv ”, 3 „suzdržana” )*

## **Ad. 6.**

### **Prijedlog Odluke o produženju važenja regulacionih planova na području Općine Gornji Vakuf-Uskoplje, skraćeni postupak**

Sofić O.-ispred predlagača

- Dao je kratko obrazloženje Prijedloga Odluke o produženju važenja regulacionih planova na području Općine Gornji Vakuf-Uskoplje, skraćeni postupak

Diskusije:

Petrović H.-ispred komisije za prostorno planiranje, uređenje i ekologiju

- Komisija za Prostorno planiranje, uređenje i ekologiju na svojoj drugoj sjednici održanoj 05.07. 2017. godine razmatrala je prijedlog Odluke o produženju važenja regulacionih planova na području Općine Gornji Vakuf-Uskoplje, komisija daje pozitivno mišljenje na prijedlog Odluke, uz sugestiju vijeću i predlagaču da razmotri potrebu za donošenjem ove Odluke, iste nije ograničeno vrijeme valjanosti, niti samom odlukom o usvajanju i provođenju navedenih regulacionih planova, niti zakonom koji uređuje ovu oblast, ako ocijene da ima potrebe, komisija predlaže Općinskom vijeću Gornji Vakuf-Uskoplje da je usvoji.

Herceg J.-ispred komisije za Statut i propise

- Komisija za Statut i propise ima jednu primjedbu u članu 2. stoji; ... *Detaljni planovi iz člana 1 ove Odluke su donešeni u periodu 1979 godine do 1990. godine a istima se produžuje rok na period od 3 (tri) godine od dana donošenja ove Odluke..., a treba;... Detaljni planovi iz člana 1 ove Odluke su donešeni u periodu 1979 godine do 1990. godine a istima se produžuje rok na period od 3 (tri) godine od dana stupanja na snagu ove Odluke.*

Elez B.-HL

- Prije svega mislim da je ova tačka suvišna, regulacioni plan nije narezak da mu je istekao rok.
- Imamo dosta Zakona, Odluka, koje su donesene prije više od pedeset godina i još se primjenjuju. Samim tim mislim da postojeći plan ne treba produžavati, jer je na snazi sve dotle dok se ne donese neki novi.

Sofić O.-odgovori

- Slažem se sa B. Elezom, ovi regulacioni planovi nemaju i nisu definisani nekim rokom, osim Prostornog plana općine
- Ministarstvo ima želju i intenciju da se Općina, odnosno Općinsko vijeće očituje o regulacionim planovima. Da li će iste ostaviti na snazi, odnosno da li će vijeće biti saglasno da se taj regulacioni plan i dalje koristi, a one koji su narušeni da ih stavi van snage.
- Za neke regulacione planove bi trebalo uraditi izmjene i dopune (regulacioni plan „Bililo“ ) iz razloga što pojedini objekti nisu obuhvaćeni regulacionim planom.

Elez B.-replika

- Nisam tražio da se izbacila ova tačka dnevnog reda, da sam to tražio to bi uradio prilikom usvajanja dnevnog reda, nego sam samo konstatovao da je ova tačka suvišna
- Predlažem da Općinsko vijeće donese zaključak kojim će se konstatovati da je regulacioni plan za ova područja važeći sve dotle dok se ne donese novi regulacioni plan, s tim da član 2. postaje suvišan

Batinić G.-predsjednik OV-a

- Dajem na usvajanje Prijedlog Odluke o produženju važenja regulacionih planova na području Općine Gornji Vakuf-Uskoplje, skraćeni postupak

*Prijedlog Odluke o produženju važenja regulacionih planova na području Općine Gornji Vakuf-Uskoplje, uz navedenu izmjenu usvojen sa većinom glasova ( 19 «za», 3 „protiv“, 1 „suzdržan“ )*

## **Ad. 7.**

### **Prijedlog Odluke o prestanku važenja regulacionih planova na području Općine Gornji Vakuf-Uskoplje, skraćeni postupak**

Sofić O.-ispred predlagača

- Dao je kratko obrazloženje Prijedloga Odluke o prestanku važenja regulacionih planova na području Općine Gornji Vakuf-Uskoplje, skraćeni postupak

Diskusije:

Petrović H.-ispred komisije za prostorno planiranje, uređenje i ekologiju

- Komisija za Prostorno planiranje, uređenje i ekologiju je na svojoj drugoj sjednici održanoj 05.07. 2017. godine razmatrala prijedlog Odluke o prestanku važenja regulacionih planova na području Općine Gornji Vakuf-Uskoplje, komisija daje pozitivno mišljenje na prijedlog Odluke o prestanku važenja regulacionih planova na području Općine Gornji Vakuf-Uskoplje, te predlaže Općinskom vijeću da je usvoji.

Herceg J.-ispred komisije za Statut i propise

- Komisija za Statut i propise ima jednu primjedbu u članu 2. stoji; ... *Regulacioni planovi iz člana 1. ove Odluke su donešeni 1981. godine (Regulacioni plan „Košute I“), odnosno 1982. godine (Regulacioni plan „Gornje polje“) a isti prestaju važiti sa danom donošenja*

ove Odluke..., a treba;... *Regulacioni donešeni 1981.*

*planovi iz člana 1. ove Odluke su*

*godine (Regulacioni plan „Košute I“), odnosno 1982. godine (Regulacioni plan „Gornje polje“) a isti prestaju važiti sa danom stupanja na snagu ove Odluke...*

Idrizović Dž.-SDA

- Interesuje me da li je regulacioni plan obavezujući prilikom gradnje. U obrazloženju ste naveli da on nije ispoštovan, izgleda da ćemo mi nešto legalizovati što je napravljeno nelegalno
- Šta ćemo ako neko gore odluči da nešto pravi a nemamo regulacioni plan, jesmo li odmah trebali imati neko rješenje za takve slučajeve

Karamustafić N.-SDP

- Ko je dozvolio da neko bespravno napravi kuću. Ja kada sam je pravio nije moglo. Čija je odgovornost i ko bi trebao odgovarati. Znamo ko snosi posljedice mi koji trebamo donijeti nekakvu odluku nelegalno.

Sofić O.-ispred predlagača

- Regulacioni plan je obavezujući, gdje ima regulacioni plan tu služba ima zavezane ruke što znači da se mora ispoštovati regulacioni plan, odnosno da bi se trebao ispoštovati bez bilo kakvih odstupanja.
- Kad ne postoji regulacioni plan onda odlučuje stručna komisija koju je formiralo Općinsko vijeće
- Najbolje bi bilo da imamo za sva područja donesene regulacione planove i da se radi po njima
- Moram da kažem da je došlo do narušavanja regulacionih planova, došlo je do uzurpacija, došlo je do nelegalne gradnje.

Batinić G.-predsjednik OV-a

- Dajem na usvajanje prijedlog Odluke o prestanku važenja regulacionih planova na području Općine Gornji Vakuf-Uskoplje

*Prijedlog Odluke o prestanku važenja regulacionih planova na području Općine Gornji Vakuf-Uskoplje uz navedene izmjene usvojen sa većinom glasova ( 19 «za», 3 „protiv“, 0 „suzdržanih“ )*

## **Ad. 8.**

### **Informacija o privredi u Općini Gornji Vakuf-Uskoplje u 2016.godini**

Milić N.-ispred izvjestioca

- Dao je kratko obrazloženje Informacije o privredi u Općini Gornji Vakuf-Uskoplje u 2016.godini

Diskusije:

Novaković M.-HL

- Pohvalio bih neke firme koje imaju tendenciju „rasta“ i možda da se napravi neki sastanak sa firmama koje imaju tendenciju „padanja“ u zadnje dvije godine, uglavnom stanje je zadovoljavajuće.

Kičin K.-SDP

- U dijelu informacije dio „nezaposlenost“ stoji;... na dan 31.12. 2015. godine stoji da je nezaposlenih na našoj općini 3064 osobe. Ako taj broj oduzmemo od 6170-broja radno sposobnog osoba, dobijemo 3106 uposlenih. U drugom dijelu na trećoj strani imajući u vidu da je na dan 31. 12. 2016. godine broj registrovanih radno sposobnih osoba 6170, gdje je od toga 3176 uposlenih, znači za 70 više. Onda opet u nastavku teksta stoji 3199 uposlenih.
- Koliki procent prihoda dobije općina Gornji Vakuf-Uskoplje od mini hidro elektrana u skladu

sa zakonskim propisima

Herceg J.-HL

- Mislim da je ova Informacija o privredi u Općini Gornji Vakuf-Uskoplje u 2016.godini štura, neke stvari se samo prepisu iz prethodnih informacija
- Mislim da je stvarno stanje malo drugačije, hoću reći da mi u privredi imamo određenih problema prilikom zapošljavanja novih ljudi posebno zbog toga što dobivamo kadar koji nam trenutno ne treba (moramo ga prekvalifikovati), hoću reći imamo neadekvatnu radnu snagu na zavodima za zapošljavanje
- Sigurno je i to da naše plaće nisu dovoljne i da malo koga možeš zadržati sa plaćom, sigurno su plaće u proizvodnji ispod svih normi (plaće ispod 500,00 KM). Da bi plaće bile veće sigurno je da poslodavcima treba malo više prostora i vremena iz razloga što kupci koji dolaze iz evrope očekuju da su kod nas cijene proizvoda niže nego što su kod njih odnosno u regiji oko nas ( Slovenija, Hrvatska)
- Kako zaustaviti odlazak ljudi iz firmi u kojima trenutno rade, kako stvoriti bolji poslovni ambijent da radnici dobivaju malo veće plaće u firmama u kojima su zaposleni, plaću sa kojom bi oni bili zadovoljni
- Predložio bih da se napravi jedan sastanak sa privrednicima, da pokušamo jedni drugima pomoći, da vidimo koji su to problemi sa kojima se oni susreću i da vidimo na koji način bi se oni mogli riješiti, sigurno je da se ne mogu odjednom riješiti

Milić N.-ispred izvjestioca

- Sve podatke koji se nalaze u ovoj Informaciji o privredi u općini Gornji Vakuf-Uskoplje u 2016.godini sam prepisao sa službene stranice Službe za zapošljavanje Srednjobosanskog kantona, svi podaci su izvađeni od tamo.
- Za sljedeću informaciju ću se potruditi da dostavim podatke u KM koliko je općina prihodovala sredstava od koncesija za mini hidroelektrane
- Cilj ove Informacije je da prikaže stanje u privredi kako jeste u općini Gornji Vakuf-Uskoplje

Herceg J.-HL

- Smatram da bi naše turističke kapacitete trebalo animirati u svakom pogledu prije svega kad je u pitanju planinski turizam Vranice i Raduše, kako ljetni tako i zimski

Batinić G.-Predsjednik vijeća

- Dajem na usvajanje sljedeći Zaključak: *Prihvata se Informacija o privredi u Općini Gornji Vakuf-Uskoplje u 2016.godini*

*Zaključak o Informaciji o privredi u Općini Gornji Vakuf-Uskoplje u 2016.godini usvojen jednoglasno sa ( 23 „za“)*

#### **Ad. 9.**

**Prijedlog Odluke o izmjenama i dopunama Odluke o naknadama vijećnicima i članovima stalnih i povremenih radnih tijela Općinskog vijeća Gornji Vakuf-Uskoplje, skraćeni postupak**

Ramić A.-ispred predlagača

- Dao je kratko obrazloženje prijedloga Odluke o izmjenama i dopunama Odluke o naknadama vijećnicima i članovima stalnih i povremenih radnih tijela Općinskog vijeća Gornji Vakuf-Uskoplje, skraćeni postupak

Diskusije:-

*Prijedlog Odluke o izmjenama i dopunama Odluke o naknadama vijećnicima i članovima stalnih i povremenih radnih tijela Općinskog vijeća Gornji Vakuf-Uskoplje, skraćeni postupak usvojen jednoglasno sa ( 23 „za“ )*

#### **Ad. 10.**

## **Prijedlog Rješenja o imenovanju Komisije za izlaganje na javni uvid podataka premjera i katastarskog klasiranja zemljišta za katastarske općine k.o. Voljice i k.o. Podgrađe**

Čaušević S.-Općinski načelnik

- Dao je kratko obrazloženje prijedloga Rješenja o imenovanju Komisije za izlaganje na javni uvid podataka premjera i katastarskog klasiranja zemljišta za katastarske općine k.o. Voljice i k.o. Podgrađe
- U Komisiju za k.o. Voljice predlažu se slijedom navedena lica u sljedećem sastavu :

1. Senada Čatić, predsjednik
2. Ivana Slipac, zamjenik predsjednika
3. Ruža Pilić, član
4. Adin Čatić, zamjenik člana
5. Sabit Čaušević, član
6. Semko Prijić, član
7. Božo Novaković, član.

U Komisiju za k.o. Podgrađe predlažu se slijedom navedena lica u sljedećem sastavu :

1. Amra Brzika, predsjednik,
2. Ivana Slipac, zamjenik predsjednika,
3. Ana Matišić, član,
4. Adin Čatić, zamjenika člana,
5. Frano Rezo, član,
6. Josip Martinović, član,
7. Ensar Muminović, član.

Diskusije:

Herceg J.-ispred komisije za Statut i propise

- Komisija za Statut i propise ima dopune kad je u pitanju preambula, gdje stoji;... *Na osnovu odredbi člana 69. Zakon o premjeru i katastru nekretnina („Službeni list SRBiH“ broj 22/84 ... treba dodati;... 12/07, 24/90, 36/90, „Službeni list R BiH“, br. 4/93 i 13/94 )...*

*Prijedlog Rješenja o imenovanju Komisija za izlaganje na javni uvid podataka premjera i katastarskog klasiranja zemljišta za katastarske općine k.o. Voljice i k.o. Podgrađe uz navedene dopune usvojen je jednoglasno sa ( 23 „za“ )*

### **Ad. 11.**

## **Prijedlog Rješenja o razrješenju člana Komisije za statut i propise Općinskog vijeća Gornji Vakuf-Uskoplje**

Idrizović Dž.-ispred predlagača

- Dao je kratko obrazloženje prijedloga Rješenja o razrješenju Joze Šekerije člana Komisije za statut i propise Općinskog vijeća Gornji Vakuf-Uskoplje

Diskusije:-

*Prijedlog Rješenja o razrješenju Joze Šekerije člana Komisije za statut i propise Općinskog vijeća Gornji Vakuf-Uskoplje usvojen jednoglasno sa ( 23 „za“ )*

### **Ad. 12.**

## **Prijedlog Rješenja o imenovanju člana Komisije za statut i propise Općinskog vijeća**

## **Gornji Vakuf-Uskoplje**

Idrizović Dž.-ispred predlagača

- Dao je kratko obrazloženje prijedloga Rješenja o imenovanju Berislava Eleza za člana Komisije za statut i propise Općinskog vijeća Gornji Vakuf-Uskoplje

Diskusije:-

*Prijedlog Rješenja o imenovanju Berislava Eleza za člana Komisije za statut i propise Općinskog vijeća Gornji Vakuf-Uskoplje usvojen jednoglasno sa ( 23 „za“ )*

*Sjednica završena u 13<sup>30</sup> sati.*

ZAPISNIČAR

Redžić Hidajet

PREDSJEDNIK  
OPĆINSKOG VIJEĆA

Batinić Goran, mag.nov.